

Evening Dogri (NSD) Bulletin 12-06-2024

आकाशवाणी

खास खबरां ...

- 1 प्रधानमंत्री नरेन्द्र मोदी होर इस म्हीने दी 14 तरीक गी इटली च होने आले जी-7 शिखर सम्मेलन च हिस्सा लैने लेई कल इटली जा'रदे न।
- 2 जम्मू कश्मीर दे कठुआ जिले च होए दे टाकरे च 2 आतंकवादी मारे गे। सीआरपीएफ दा इक जुआन शहीद, एडीजीपी जम्मू जोन होरें आखेआ जे अभियान अजें जारी ऐ।
- 3 तेलगुदेशम पार्टी प्रमुख एन.चन्द्रबाबू नायडू होरें आंध्रप्रदेश दे मुखमंत्री दे तौर पर सगंध लैती। प्रधानमंत्री नरेन्द्र मोदी होरें नायडू होरें गी मुबारकबाद दित्ती।
- 4 विदेशमंत्री डॉ. एस.जयशंकर होरें कुवैत च अगग लगने आली घटना पर डूंहगा दुख ते बसोस जाहर कीता। प्रधानमंत्री मोदी होरें बी इस घटना पर दुख जताया ऐ।
- 5 18मीं लोकसभा दा पैहला सत्र 24 जून थमां लग्गोग।

<><><><><><>

PM-Itly

प्रधानमंत्री नरेन्द्र मोदी होर जी-7 शिखर सम्मेलन च शामिल होने लेई कल इटली जांगन। विदेश सचिव विनय क्वात्रा होरें दस्सेआ जे शुक्रवार गी होने आले सम्मेलन च भारत तगर पुज्ज बनाने लेई एह्दे च साद्दा दित्ता गेआ ऐ। उनें आखेआ जे एह यात्रा भारत ते ग्लोबल साउथ आस्तै महत्वपूर्ण मुद्दें पर सम्मेलन च विश्व नेताएं कन्नै जुड़ने दा मौका होग। शिखर सम्मेलन च भारत दी एह 11मीं ते मोदी हुंदी लगातार 5मीं हिस्सेदारी होग। प्रधानमंत्री होर भारत तगर

पुज्ज बनाने आले सत्र च शामिल होंगन। सममेलन थमां बक्ख मोदी हुंदी जी-7 मुख्य दे नेताएं कन्नै दपक्खी बैठकां करने दी संभावना ऐ। मोदी होर इटली दी प्रधानमंत्री हुंदे कन्नै बी मलाटी करगंन। दवै प्रधानमंत्री पिछले ब8रे अबू धाबी च कॉप-28 शिखर सम्मेलन च मिले हे। विदेश सचिव होरें आखेआ जे भारत स्विट्जरलैंड च होने आले यूक्रेन शांति शिखर सम्मेलन च उचित सतह पर शामिल होग। इस म्हीने स्विट्जरलैंड च आयोजित सम्मेलन च लगभग 90 मुख्य शामिल होंगन।

<><><><><><>

Kathua-Doda Attack

कठुआ जिले दे हीरानगर इलाके च इक घरै अंदर बड़े दे आतंकवादिएं कन्नै कल संजा छिड़े दे इक टाकरे च दऊं आतंकवादी मारे गे न ते सीआरपीएफ दा इक जुआन शहीद होइ गेआ ऐ जिसलै जे इस कारवाई दरान इक आम नागरिक दे घायल होने दी बी खबर ऐ। जानकारी मूजब एह आतंकवादी हाल च गै बन्ने पारा घुसपैठ करियै आए दे हे ते कूटा मोड़ सैयदा सुखल ग्रां च एह लोक इक घरै अंदर बड़ी गे हे जेहदे बाद टाकरा भखी गेआ हा। अज्ज बडलै मूह न्हरे परतियै टाकरे आले थाहरै पर गोलीबारी शुरू होई जेहदे च सीआरपीएफ दा इक कांस्टेबल जख्मी होई गेआ जिसी हीरानगर दे उप-जिला अस्पताल पजाया गेआ जित्थें जख्में दी ताब नेई जरदे होई ओह वीर गति गी प्राप्त होई गेआ। इस बारे तफसीली जानकारी दिंदे होई जम्मू जोन दे एडीजीपी आनंद जैन होरें अज्ज दस्सेआ जे हीरानगर टाकरे च दऊं आतंकवादी मारे गे न ते सीआरपीएफ दा इक जुआन शहीद होआ ऐ, पर इलाके च तुपाई अजें जारी ऐ ते कारवाई गी अजें खत्म घोषत नेई कीता गेदा ऐ। एडीजीपी होरें उआं दस्सेआ जे कल संजा लै शुरू होए दा टाकरा अज्ज दपैहरी खत्म होआ ऐ। पर अभियान अजें खत्म नेई कीता गेदा की जे किश होर आतंकवादिएं दे उत्थें छप्पे होने दी शैका गी नजर अंदाज नेई कीता जाई सकदा। कारवाई दरान घायल आम नागरिक दी हालत बारे उनें आखेआ जे ओह खतरे शा बाहूर ऐ। उनें दस्सेआ जे मारे गेदे

आतंकवादिएं कशा ग्रनेड, आईईडी विस्फोटक, अमरीका च बनी दी एम7फोर कारबाइन ते होर दुआ समेयान बरामद कीता गोआ ऐ।

<><><><><><>

Doda

भद्रवाह दे छत्तरगला च जंदी रातीं फौज दी चौकी पर होए दे आतंकी हमले मगरा समूलचे डोडा जिले च सुरक्षा निग्गर करी दित्ती गई ऐ। इस हमले च सेना दे 5 जुआन जख्मी होइ गे। पिछले 20 ब'रें च एह सब्बने शा बड्डा हमला मन्नेआ जा'रदा ऐ। साढे जिला संवाददाता फयाज पम्पोरी होरें जानकारी दित्ती ऐ जे सुरक्षाबलें डोडा भद्रवाह जरनैली शिड़क दे इलावा होर केई थाहरें उप्पर नाके लाए न ते सब्बने गड्डिडएं दी जांच कीती जा'रदी ऐ। घायल होए दे जुआनें गी इलाज लेई अस्पताल भर्ती कीता गेदा ऐ ते इलाके च आतंकवादिएं गी फगड़ने लेई तपाशी अभियान चलाया जा'रदा ऐ। मकामी लोकें गी सुरक्षा बलें दा सैहयोग करने ते कुसा बी संदिग्ध गतिविधिएं बारे जानकारी सांझी करने दी सलाह दित्ती गई ऐ।

<><><><><><>

Naidu Sworn In

तेलगुदेशम पार्टी दे प्रमुख नारा चन्द्रबाबू नायडू होरें अज्ज कृष्णा जिले दे केसरपल्ली च आंध्रप्रदेश दे नमें मुखमंत्री दे तौरा पर सगंध चुककी। शपथ ग्रहण समारोह च प्रधानमंत्री नरेन्द्र मोदी, केन्द्री मंत्री अमित शाह, राष्ट्रीय जनतांत्रिक गठबंधन दे केई होर नेता शामिल होए। आंध्रप्रदेश दे राज्यपाल एस. अब्दुल नजीर होरें बडलै 11 बज्जियै 27 मिंटे पर उनेंगी मुखमंत्री दे औहदे ते राजदारी दी सगंध चुकाई। एहदे इलावा इस मौके मजूद होरने 24 लीडरें जिनेंगी सगंध चुकोई गई उंदे च जन सेना पार्टी दे प्रमुख के.पासवान कल्याण, टीडीपी दे महासचिव नारा लोकेश ते बीजेपी दे वरिष्ठ लीडर सत्य कुमार यादव बी

शामल हे। प्रधानमंत्री नरेन्द्र मोदी होरें एन.चन्द्रबाबू नायडू होरें गी आंध्रप्रदेश दे मुखमंत्री दे औहदे दी सगंध लैने पर बधाई दित्ती ऐ। इक सोशल मीडिया पोस्ट च मोदी होरें आखेआ जे तेलगुदेशम पार्टीरु जन सेना ते बीजेपी गठबंधन दी सरकार आंध्रप्रदेश गी नमीं उंचाइं पर लेई जाने ते राज्य दे युवाएं दी आसे-तागें गी पूरा करने लेई पूरी चाल्ली वचनबद्ध ऐ।

<><><><><><>

TN Naidu CM

होरने मन्ने परमन्ने दे लोकें जिनें कार्यक्रम च शिरकत कीती उंदे च केन्द्रीय गृहमंत्री, सेहत मंत्री, शिड़क यातायात ते राष्ट्रीय जरनैलील शिड़क सरबंधी मंत्री, बीजेपी अध्यक्ष, बीजेपी दी भ्याल पार्टीं दे मंत्री ते नेता जिंदे च चिराग पासवान, रामदास अठावले, अनुप्रिया पटेल, महाराष्ट्र दे मुखमंत्री एकनाथ शिंदे, साबका उपराष्ट्रपति एम.वैकेया नायडू, फिल्म अभिनेता चिरनजीवि ते रजनीकांत , सिंगापुर, जापान, दक्खन कोरिया, आस्ट्रेलिया ते फ्रांस दे राजदूतें बी कार्यक्रम च हिस्सा लैता।

<><><><><><>

Minister Charge

शिड़क यातायात ते राष्ट्रीय जरनैली शिड़के सरबंधी मंत्री नितिन गडकरी होरें अज्ज अपने औहदे दा कम्मकाज सांभेआ। इस मौके गडकरी होरें मोदी सरकार दे त्रिए कार्यकाल च उनेंगी एह जिम्मेदारी सौंपने आस्तै प्रधान मंत्री हुंदा आभर जताया। उनें आखेआ जे मोदील हुंदी दूरदर्शी अगुवाई च भारत विश्व स्तरीय ते आधुनिक बुनियादी ढांचे कन्नै लैस होआ8रदा ऐ। राज्य मंत्री अजय टमटा ते होष मल्होत्रा होरें बी शिड़क यातायात ते जरनैली शिड़के सरबंधी राज्यमंत्री दा औहदा सांभेआ। उत्तर पूर्व क्षेत्र दे विकास मंत्रालय दा औहदा संभालने मगरा केन्द्रीय मंत्री ज्योतिरादित्य सिंधिया होरें एह जिम्मेदारी सौंपने आस्तै प्रधानमंत्री नरेन्द्र

मोदी हुंदा आभार व्यक्त कीता ते आखेआ जे पिछले 10 ब'रे च पूर्वोत्तर क्षेत्र म्हेशा प्रधानमंत्री नरेन्द्र मोदी हुंदी प्राथमिकता रेआ ऐ।

<><><><><><>

Palhad Meeting

केन्द्रीय मंत्री प्रल्हाद जोशी होरें खुराक ते सार्वजनिक बंड सरबंधी मैहकमे दे अधिकारिएं कन्नै पैहली बैठक कीती। उंदे कन्नै केन्द्रीय राज्य मंत्री बी.एल.वर्मा होर बी मजूद हे। इस बैठक च खुराक ते सार्वजनिक बंड आली प्रक्रिया गी होर मजबूत बनाने आस्ते लोडचदी रणनीति ते जरूरी गैह पर चर्चा होई। उनें देशवासिएं आस्तै खाद्य सुरक्षा जकीनी करने दी वचलबद्धता बी दोहराई।

<><><><><><>

Minister

निर्मला सीतारमण होरें अज्ज नमीं दिल्ली च वित्त ते बपार मामले दे केन्द्रीय मंत्री दा कार्यकाल सांभेआ ऐ। उनें प्रधानमंत्री नरेन्द्र मोदी हुंदा धन्नबाद कीता जे मोदी होरें इक बारी परतियै उंदे उप्पर विश्वास जतांदे होई उनेंगी केन्द्रीय वित्त ते बपार मामले दे मंत्री दे रूपै च कम्म करने दा मौका दित्ता। तोआई नितिन गडकरी होरें बी अज्ज शिडक यातायात ते हाइवे मंत्री दा पदभार ग्रेहण कीता। इस मौके उप्पर बोलदे होई गडकरी होरें प्रधानमंत्री नरेन्द्र मोदी हुंदा आभार प्रगट कीता जे उनें अपने त्रीये कार्यकाल च उनेंगी इक बारी परतियै अपनियां सेवा देने दा मौका दित्ता ऐ।

<><><><><><>

Jai Shankar Kuwait

विदेश मंत्री एस.जयशंकर होरें कुवैत शैहर च बड़ी मती अग्ग लगी जाने आली घटना पर डूहंगा दुख ते बसोस जाहर कीता ऐ। एह्दे च 40 थमां मते लोकें दी मौत होई गई ऐ ते 50 थमां मते लोक घायल होइ गे न। डॉ. जयशंकर होरें भरोसा दोआया जे कुवैत च भारतीय दूतावास प्रभावत सब्बने लोकें गी सहायता प्रदान करोग।

<><><><><><>

PM-Kuwait

प्रधानमंत्री नरेन्द्र मोदी होरें कुवैत शैहर च अग्ग लगने आली घटना पर दुख जाहर कीता। उनें आखेआ जे उंदी हमदर्दी उनें सारे लोकें कन्नै ऐ जिने अपनं गी गवाया ऐ। उनें घायलें दे तौले नरोए होन दी कामना कीती। प्रधानमंत्री होरें आखेआ जे कुवैत च भारतीय दूतावास स्थिति पर तक्क रक्खा'रदा ऐ ते प्रभावतें दी सहायता लेई अधिकारी कन्नै कम्म करा'रदा ऐ।

<><><><><><>

Indian Army Kargil

भारतीय सेना नै इक पैन इंडिया मोटर सैकल अण्णियान शुरू कीता जेहड़ा 1999 दे कारगिल युद्ध च पाकिस्तान पर भारत दी जित्त दे 25 ब'रे पूरे होने दे चेते च इक यात्रा ऐ। रक्षा मंत्रालय नै आखेआ ऐ जे एह् अभियान मुख् दे वीर सैनिकें दे महत्वपूर्ण योगदान गी दर्शाने ते उंदी विरासत दा सम्मान करने दा कम्म करदा ऐ। 8-8 मोटर सैकल चालक त्रै दलें च मुख् दे त्रै कोणे असम दे दिनजान, गुजरात दे द्वारका ते तमिलनाडू दे धनुषकोडी थमां इस ऐतिहासक यात्रा पर निकले न। एह् बक्ख-बक्ख इलाके ते रस्ते गी पार करोग जेहड़ा सशस्त्र बलें दी एकता ते लचीलेपन दा प्रतीक ऐ।

<><><><><><>

UGC

विश्वविद्यालय अनुदान आयोग यूजीसी नै उच्च शिक्षण संस्थानें गी अगले माली ब'रे थमां साल च छात्रें गी दो बारी प्रवेश देने दी इजाजत देने दा फैसला लैता ऐ। इसलै यूजीसी इक ब'रे च इक शैक्षणिक सत्र च प्रवेश दी इजाजत दिंदा ऐ। यूजीसी दे अध्यक्ष प्रो. एम.जगदीश कुमार होरें आखेआ जे एहदे कन्नै उनें बच्चें गी मता फायदा थ्होग जिंदे बोर्ड दे नतीजे दी घोषणा च चिर होई जंदा ऐ जां पही जेहडे निजी कारणें करी दाखले थमां रेई जंदे न।

<><><><><><><>

NEET

राष्ट्रीय परीक्षा अजेंसी नै नीट 2024 परीक्षा दे नतीजे दी घोषणा मगरा आम तौरा उप्पर पुच्छे जाने आले सुआलें दी सूचि जारी कीती ऐ। इस म्हीने दी 4 तरीक गी घोषत कीते गेदे नीट नतीजें च कथित गड़बड़िणं गी दिक्खदे होई एह प्रश्नावली जारी कीती गई ऐ। मतेयान देने आले विद्यार्थिणं गी समें दी हानि लेई कंपेनस्टरी नंबर देने च शकैत निवारण समिति दी भूमका उप्पर अजेंसी नै गलाया जे इक समिति दा गठन कीता गेआ हा। समिति नै त्थयात्मक रिपोर्ट दे आधार उप्पर शकैतें उप्पर बचार कीता, जे कोई बी परीक्षार्थी, परीक्षा च 118 ते 119 नंबर किया हासल करी सकदा ऐ। इस सुआला दे परते च अजेंसी नै स्पष्ट कीता जे कंपेनस्टरी नंबरें करी दो विद्यार्थिणं गी 118 ते 119 नंबर हासल होए। केन्द्रीय मंत्रिमंडल नै नीट परीक्षा च 1 ज्हार 500 शा मते परीक्षार्थिणं गी दित्ते गेदे ग्रेस मार्सें दी समीक्षा लेई 4 सदस्यें दे पैनल दा गठन कीता ऐ।

<><><><><><><>

Parliament

18मीं लोकसभा दा पैहला सत्र इस म्हीने दी 24 तरीक कोला शुरू होआ'रदा ऐ। इस सत्र च नमें चनोए दे मिंबरें गी सगंध चुकाई जाग ते लोकसभा अध्यक्ष दा

चुनां कीता जाग। इस इजलास दी शुरूआत राष्ट्रपति द्रौपदी मुर्मू हुंदे आस्सेआ दौनें सदनें गी सांझे तौरा पर संबोधत कीते जाने कन्नै होग। जेहदे मगरा उंदे अभिभाषण पर चर्चा होग। राज्यसभा दा इजलास बी इस म्हीने दी 27 तरीक कोला शुरू होग। संसद दा एह इजलास अगले म्हीने दी 3 तरीक तोड़ी चलोग। संसदीय कार्ज मंत्री किरन रिजिजू होरें एह जानकारी इक सोशल मीडिया पोस्ट पर दित्ती ऐ। उनें आखेआ जे देसै दी जनता नै चुनाएं दरान वोट पाइयै अपना फैसला सनाई दित्ता ऐ ते हून देस दी सेवा लेई कम्म करना साढ़ा फर्ज ऐ। रिजिजू होरें आखेआ जे 140 करोड़ भारतवासिएं दिएं आसें—तागें गी पूरा करने लेई चर्चा ते सोच बचार करने लेई संसद इक आदर्श मंच ऐ।

<><><><><><>

Sikkim

11मीं सिक्किम विधानसभा दा पैहला सत्र कार्यवाहक स्पीकर संजीत खरेल हुंदी अध्यक्षता च अज्ज होआ। सदन नै सिक्किम क्रांतिकारी मोर्चा दे मेदवार ते साबका मंत्री मिग्मा नोरबू शेरपा होरें गी सदन दा अध्यक्ष चुनेआ ते राजकुमारी थापा सदन दी उपाअध्यक्ष चुनियां गोइयां। सत्र दी शुरूआत च नमें चुनाए दे सदस्यें सगंध लैती। एह सगंध प्रोटेन स्पीकर होरें दोआई। सिक्किम क्रांतिकारी मोर्चा गी राज्य च दूई बारी परतियै सरकार बनी ऐ। इस गी 32 थमां 31 सीटां हासल होइयां।

<><><><><><>

IIT Open House

इंडियन इंस्टीच्यूट ऑफ टैक्नालोजी आईआईटी दिल्ली 15 जून गी उनें मेदवारें जिनें जेईई एडवांस 2024 मतेयान पास करी लैता ऐ, उंदे आस्तै अपने दिल्ली ते यूएई दे अबूधाबी परिसर च इक खुल्ले सत्र दा सरिस्ता करोग। संस्थान नै आखेआ जे उस कार्यक्रम राएं मेदवारें अबूधाबी ते दिल्ली परिसर च उपलब्ध

बक्ख-बक्ख मौके बारे जानी सकगंन। दौनें परिसरें च छात्रें दे सुआलें दा परता बी दित्ता जाग। एह कार्यक्रम हायब्रिड मोड च आयोजित होग ते बडलै 9 बजे थमां दपैहरी 2 बजे तगर चलोग।

<><><><><><>

NHLC Widow

मनुक्खी अधिकारें सरबंधी राष्ट्रीय आयोग नै विधवाएं दे कलयाण उंदे अधिकारें गी जकीनी करने आस्तै केन्द्र राज्य सरकार ते केन्द्र शासत प्रदेश प्रशासन गी इक परामर्श जारी कीता। आयोग नै विधवाएं आस्तै 10 प्रमुख खेतरें पर ध्यान देने लेई आखेआ।

<><><><><><>

India

विश्व बैंक दी ताजा रिपोर्ट मूजब भारत अगले 3 वित्तिय ब'रे च 6.7 फीसदी स्थिर विकास दर कन्नै विश्व दी सब्बने शा तेजिया कन्नै बधने आली अर्थबवस्था बनी दी रौहग। एह वृद्धि घरेलू मंग, निवेश च बधदे ते सेवा क्षेत्र कन्ने जुड़ी दी गतिविधिएं कन्नै प्रेरित ऐ।

<><><><><><>

Cricket

आईसीसी टी-20 विश्व कप क्रिकेट च अज्ज भारत दा मकाबला अमरीका कन्नै होग। एह मैच न्यूयार्क दे नस्सउ काउंटी अंतर्राष्ट्रीय क्रिकेट स्टेडियम च खेड्डेआ जाग। दवै टीमां अपने पिछले दऊं मकाबलें च जित्त हासल करियै इस मैच च मैदान च उतरा करदे न। भारतीय टीम नै आयरलैंड ते पाकिस्तान दे खलाफ जित्त हासल कीती ही जिसलै जे अमरीका नै अपने पिछले दऊं मकाबलें च कनाडा ते पाकिस्तान गी हराया हा। भारती गुप च बेहतर रन रेट दे स्हाबै

पैहले नंबर पर ते अमरीका दुए नंबरे पर ऐ। अज्ज दो मैच खेड्डे जांगन। एंटीगुआ दे सर विवियन स्टेडियम च आस्ट्रेलिया दा मकाबला नामीबिया कन्नै होग ते फ्लोरिडा दे सेंट्रल ब्रोवार्ड रीजनल पार्क स्टेडियम च श्रीलंका दा मकाबला नेपाल कन्नै होग। एह्दे थमां पैहले अमरीका दे न्यूयार्क च नस्साउ काउंटी अंतर्राष्ट्रीय स्टेडियम च पाकिस्तान नै कनाडा गी 7एं विकटें कन्नै हराया। पाकिस्तान नै 107 रंजें दे लक्ष्य गी 17.3 ओवरें च त्रै विकटां मुआइयै जित्त हासल कीती। मोहम्मद रिजवान नै 53 गेंदें च 53 रंज ते बाबर आजम नै 33एं गेंदे च 33 रंज बनाए। पैहले बल्लेबाजी करदे होई कनाडा दी टीम नै 20 ओवरें च 7 विकटें दे नुकसान कन्नै 106 रंज बनाए।

<><><><><><>